
ԻՐԱԴՐՈՒԹՅՈՒՆ ԱՐՑԱԽՈՒՄ IX ԴԱՐԻ ԱՌԱՋԻՆ ԿԵՄԻՆ.
ՀԱՅԵՐԻ ԴԻՄԱԴՐԱԿԱՆ ԿՌԻՎՆԵՐԸ

ՀԵՆՐԻԿ ՄՎԱԶՅԱՆ

VIII դարի հիսունական թվականներին Արաբական խալիֆայությունում տեղի է ունենում դինաստիական փոփոխություն. կառավարող Օմայան հարստությանը փոխարինում է Աբասյանների տունը: Դա լուրջ հետևանքներ է թողնում ոչ միայն բուն խալիֆայությունում, այլև նրան ենթակա երկրներում, առանձնապես Մեծ Հայքում: Այստեղ խիստ բարձրանում են հարկերի չափերը, ծխահարկը փոխարինվում է գլխահարկով: Հարկատու են դառնում հասարակության բոլոր խավերը, նույնիսկ հոգևորականները, որոնք մինչ այդ ազատված էին հարկատվությունից: Հարկ է սահմանվում մինչև իսկ մեռածների համար: Ավելի բարվոք վիճակում չէին գտնվում նաև արդեն հարկ վճարողները. դեռ չվճարողներից տարբերելու համար նրանց վզից կապարե կնիքներ էին կախում: Ընդամենը, հարկահավաքությունն ընթանում էր ամենաանողորմ ձևերով: Հայ պատմիչ Ղևոնդը (VIII դ.) գրում է, որ խալիֆայության Հյուսիսային¹ փոխարքա Աբու Ջաֆար ալ-Մանսուրը (ապագա խալիֆը՝ 750-754) իր փոխարքայության սահմաններում դուրս գալով շրջագայության՝ «նախ ելեալ յաշխարհս Հայոց՝ բազում վշտօք և նեղութեամբ փտանգէր զամենեսին և հասուցանէր ի չքաւորութիւն տնանկութեան, մինչև պահանջել հարկս և ի մեռելոցն: Եւ զամենայն բազմութիւն որբոց և այրեաց չարալլուկ տառապեցուցանէր. փտանգէր զքահանայս և զպաշտօնեայս աստուածային խորանին խոշտանգանօք և քքօք այպանութեան և գանիւք՝ ի յայտ ածել զանուանս վախճանելոցն և զընտանիս նոցուն: Խոշտանգէր և զբնակիչս աշխարհիս բռնագոյն և դառն հարկապահանջութեամբ, առնուլ ըստ գլխոյ բազում զուգէս արծաթոյ, և դնել կնիք կապարեայ յամենեցուն պարանոցս»²:

Արաբական տիրապետության խստացումը, հարկերի անօրինակ բարձրացումն ու գանձման անագորոյն ձևերը, տեղական հայ իշխանների իրավունքների սահմանափակումն ու այլ անօրինականություններ անտանելի ծանր դրութեամբ

¹ Արաբներն իրենց ընդարձակածավալ տերությունը բաժանել էին հինգ փոխարքայությունների, որոնցից մեկն էր Հյուսիսայինը: Սա ներառում էր նվաճած Մեծ Հայքը, Վիրքը, Աղվանքը, Ատրպատականը, Վերին Միջագետքը (Ջալիլյան), Փոքր Ասիայի սահմանամերձ շրջանները (տե՛ս Ա. Տե՛ր - Ղևոնդի ա. ն. Արաբական խալիֆայության Հյուսիսային փոխարքայությունը. - Հնդկաձների ժողովածու, Երևան, 2003, էջ 165): Վարչական այս միավորը արաբները կոչում էին «Արմինիա»:

² Պատմություն Ղևոնդեայ Մեծի վարդապետի հայոց, Սանկտ Պետերբուրգ, 1887, էջ 127:

յուն էին ստեղծում Հայաստանում³ և հայ ժողովրդին հաճախ պայքարի հանում արաբական լծի դեմ: VIII դարի վերջին քառորդն ամբողջովին անցնում է հակաարաբական պայքարի բովում⁴:

Ծանր ու դառնաշունչ օրեր եկան և Հայոց երկրի Հյուսիսարևելյան կողմանց կամ Ուտիքի ու Արցախի համար: Այստեղ՝ նրանց մայրաքաղաք Պարտավում, որը 789 թ. Դվինի հետ դարձել էր «Արմինիա» վարչական միավորի կենտրոնը, հաստատվում են արաբ կառավարիչներ կամ, ինչպես նրանց հայ պատմիչներն էին անվանում, ոստիկաններ: Մովսես Կաղանկատվացին գրում է. «Եւ եղև այս տանս Աղուանից (իւնա՛ Հայոց Արնելից կողմանց – Ն. Ս.) գրկանք մեծապէս, զի զմայրաքաղաքն Պարտաւ իլեցին յիշխանացն Աղուանից տաճիկք ըստ իւրեանց անատակ ազգաշաղախութեանն: Եւ որպէս զառաջինն այժոռ իշխանութեանն իւրեանց արկին ի Դամասկոս Ասորեստանեայց, նոյնպէս աստ յԱղուանս նստուցին ի Պարտաւ կալ արքունեացն՝ և ծծել զպարարտութիւն երկրիս»⁵: Հաստատվելով Պարտավում՝ արաբները սկսեցին ավելի հաճախակի հարձակումներ գործել շրջակա բնակչության վրա, կողոպտել ու գերեվարություններ կատարել: Դրությունն այստեղ վատթարանում էր նաև նրանով, որ տեղի հայ բնակչությունը արաբ ոստիկանների ոտնձգություններին դիմագրավելու հետ մեկտեղ հարկադրված էր դիմադրական կոիվների դուրս գալ նմանապես հյուսիսային գանազան գեղերի ու որոշ բախտախնդիրների դեմ: Եվ նրանք սեփական իշխանների գլխավորությամբ մեկ անգամ չէ, որ, կովի դուրս գալով արաբների ու այլազգի ուրիշ ասպատակիչների դեմ, հաղթում են նրանց և ջարդելով դուրս վանում իրենց երկրի սահմաններից:

821 թ. Աղվանքի իշխան Վարազ Տրդատ Գ-ի եղեռական սպանությունից հետո հերթական անգամ Արցախում խախտվում է քաղաքական անդորրը: Օգտվելով ստեղծված իրավիճակից՝ նույն թվականին արաբական մի ընտիր զորագունդ⁶ գաղտագողի դուրս գալով Պարտավից մտնում է Ամարաս կամ Սյուս Հաբանդ գավառ, ասպատակության ենթարկում այն և շուրջ հազար հոգու գերի վերցնելով՝ ամրանում Մեծ Առանք (Մեծ Իրանք-Խաչեն) գավառի Շիկաքար⁷ կոչվող վայրում: Դա լսելով՝ այդ տիրույթների տեր Առանջահիկ իշխան, Սմբատի որդի Սահլ Սմբատյանը իր և եղբայրների միացյալ զորքերի զլուխ անցած

³ Արաբների վարած տնտեսական ու սոցիալական քաղաքականության մասին մանրամասն տե՛ս А. Т е р - Г е в о н д я н. Армения и арабский халифат. Ереван, 1977, с. 176–210.

⁴ Ն. Մ ա ն ա ն դ յ ա ն. Ժողովրդական ապստամբությունները Հայաստանում արաբական տիրապետության դեմ.– Երկեր, հ. Բ, Երևան, 1978, էջ 542-570:

⁵ Մ ո վ ս է ս Կ ա դ ա ն կ ա տ ու ա ց ի. Պատմութիւն Աղուանից աշխարհի (այսուհետև՝ Կ ա դ ա ն կ ա տ վ ա ց ի), քննական բնագիրը և ներածությունը՝ Վարազ Առաքելյանի, Երևան, 1983, էջ 325:

⁶ Ն. Քյուրտյանը գտնում է, որ սա արաբական կանոնավոր բանակի զորագունդ չէր, այլ Բաբելի աղանդի հետևորդ աղանդավորներ էին (տե՛ս Ն. Քյուրտյան. Բաբակ և Սահլ իսյն Սմբատ (էջ մը մեր իններորդ դարու պատմութենեն).– «Բազմավեպ», 1958, թիվ 3-5, էջ 72):

⁷ Ստեփանակերտի շրջանում՝ Քարագլուխ գյուղն իր շրջակայքով (տե՛ս Մ. Բ ա ր խ ու - տ ա ր յ ա ն ց. Արցախ, Բագու, 1895, էջ 167: Նաև՝ Մ. Մ ա ր գ ս յ ա ն. Արցախ, պատմաաշխարհագրական ճշգրտումներ, Երևան, 1996, էջ 68): Ըստ Ն. Քյուրտյանի՝ այստեղ էին պաշարված նաև Սահլի կիներ, երեխաները և կնոջ վանական եղբայրը (տե՛ս Ն. Քյուրտյան. նշվ. աշխ., էջ 76):

հարձակվում է նրանց վրա և մի մասին կոտորելով, իսկ մյուսներին փախուստի մատնելով՝ ազատում է գերիներին ու վերադարձնում ավարը: «Բսկ ի լնուլ ՄՀ. թուոյ հայոց (821 թ. – Հ. Ս.) էլին գաղտաբար ի Պարտաւայ արք ընտիրք ի Տաճկաց և յաւարի առին զԱմարաս գաւառ և գերի առեալ իբրև ոգիս հազարա և ի Մեծիբանց սահմանի ամրացեալք՝ ի տեղոջն, որ կոչի Շիկաքար: Յայնժամ արի ու շքեղատեսակն Սահլի Սմբատեան Եռանշահիկն տեր՝ քաջագոր եղբարքք իրուվք և զօրօքն իւրեանց ի լուսանալ առաւօտուն ի վերայ յարձակեալ առ հասարակ դիաթաւալ զնոսա ցիր և ցան կացուցանէին, և որպէս յառիժոյ ժանեաց զգերեալսն ի բաց կորզէին»⁸, – գրում է Կաղանկատվացին: Այս հարվածից հետո արաբները երկար ժամանակ հանգիստ են թողնում մերձակա շրջանների բնակիչներին: Այսուհանդերձ արաբական վտանգը մնում էր, բայց և դրա առաջ չէին ընկրկել նաև արցախահայերը: Վերը նկարագրված դեպքերից մոտ մեկ ու կես տասնամյակ անց՝ 837 թ. արաբական մի այլ՝ տասներկու հազարանոց հեծելազունը Բաղդադից հանկարծակի հայտնվելով, ներխուժում է Արցախ՝ կողոպուտ փնտրելով այստեղ: Սակայն, մինչ արաբները կհասցնեն ասպատակել երկիրը, Կաղանկատվացու վկայությամբ, արցախահայերը նույն Առանշահիկ իշխանի գլխավորությամբ հուժկու հարվածներով դարձյալ կոտորում են նրանց ու դուրս վռնդում: Պատմիչի պատկերավոր նկարագրությամբ, կովի բռնվելով նրանց հետ Սահլ Սմբատյանը «որպէս արծուի խոյացեալ ի տկար թռչունս՝ այսր անդր ցրուեալ տապաստ դաշտացն արկեալ վաներ»⁹, մեկ անգամ ևս երկիրն ազատելով նոր ավերածություններից ու գերեվարություններից: Արցախցիները արաբներին հաջողությամբ դիմագրավելու հետ մեկտեղ, հաճախակի ըմբոստանալով, իրենք էին նախահարձակ լինում:

835 թ. արաբական խալիֆայության Հյուսիսային փոխարքա էր նշանակվել Ալ Աֆշին Հայդար իբն Քաուսը (835–840 թթ.), որը, անցնելով իր պարտականությունների կատարմանը, էլ ավելի է բարձրացնում հարկերը, խորացնելով առանց այդ էլ դրանց ծանրությունից նեղվող հայերի դժգոհությունը: Շուտով Հայաստան որպես կառավարիչ է ուղարկվում Մուհամեդ իբն Մուլայման Սամարքանդցին (835–839 թթ.): Վերջինս 837 թ. իր քարտուղարի հետ մեկնում է Արցախ՝ հարկերը հավաքելու: Նրա գործողություններից ու ծանր հարկերից դժգոհ հայերը Սահլ Սմբատյանի առաջնորդությամբ, ըմբոստանում են նրա դեմ, սպանում են քարտուղարին, իսկ իրեն էլ փախուստի մատնում¹⁰: Այս հանդուգն արարքը, սակայն, մնում է անպատիժ: Հավանաբար, մի կողմից ցանկանալով մեղմել իրենց հարկային ծանր քաղաքականության հետևանքով առաջացած լարվածությունը, մյուս կողմից էլ տարված լինելով ներքին խնդիրներով ու, մանավանդ, նույն թվականին Արցախում հայտնված խուրամյան շարժման աղանդապետ Բաբեկին հայ իշխանների օգնությամբ ձերբակալելու հետևանքով,

⁸ Կ ա ղ ա ն կ ա տ վ ա ց ի, էջ 326:

⁹ Նույն տեղում, էջ 330

¹⁰ Б а л а д з о р и. Книга завоевания стран, пер. П. К. Жузе. Баку, 1927, с. 21; Յ ա ր ու ր ի.– Արաբացի մատենագրեր Հայաստանի մասին, հավաքեց և թարգմանեց Բագրատ Խալաթյանց, Վիեննա, 1919, էջ 120:

արարները հանդուրժողական վերաբերմունք են դրսևորում ապստամբների նկատմամբ:

IX դարի սկզբներին Ասորպատականում ծագել էր մի շարժում, որն իր պայքարի գաղափարական գեները էր դարձրել խուրամյան¹¹ կոչվող աղանդավորականների վարդապետությունը: Ըստ Միքայել Ասորի պատմիչի՝ սրանց աղանդի հիմքում ընկած էր հավատը Մահադի անունով ոմն մարգարեի նկատմամբ, որին անմահության հատկանիշ վերագրելով, նրա հետևորդները հույս էին տածում, թե նա պիտի գա և արդարություն տարածի երկրի վրա¹²: Շուտով սրանց շարքերում հայտնվում է մեկը, որն իրեն անվանում է Մահադի և ներկայանում որպես նրանց սպասած մարգարեն¹³: Մա հայկական ու արաբական աղբյուրներից հայտնի Բաբեկն էր (Բաբակը, Բաբանը, Բաբը): Չարաշահելով աղանդավորականների կրոնական զգացմունքները ու ելնելով հիշյալ աղանդի էությունից՝ այս արկածախնդիր ավագակր իրեն անմահ է հռչակում: «Ասէր զինքն անմահ», գրում է Վարդան Արնեյցին¹⁴: Խաբեությամբ շահելով աղանդավորականների վստահությունն ու անցնելով շարժման գլուխ՝ նախկին ջորեպանը, Միքայել Ասորու վկայությամբ, «Երթայր յամենայն կողմանս և զամենայն ազգ միապես կոտորէր... եւ հարկանէր և աւերէր առհասարակ»¹⁵: Ասպատակություններ սփռելով շուրջ բոլորը՝ նա արդեն 821 թ. իր գորախմբերով հայտնվում է Հայոց Արնեյց կողմերում: Այդ տարի Հայաստան է արշավում Սևադա անունով մի արաբ զորավար (ըստ Մտ. Օրբելյանի՝ Մրվանը, որ հայտնի էր նաև Ավառանշան անունով). ասպատակում է երկիրը, ավերի ու ավարի ենթարկում նաև Մահլի տիրույթները ու անցնում Սյունիք՝ ամրանալով Ծղուկ գավառի Շադատ ավանի բերդատեղիում¹⁶: Սյունաց Վասակ իշխանը կանչում է այս Բաբեկին և նրա օգնությամբ դուրս վանում Սևադային իր երկրի սահմաններից: Այսպես հայտնվելով Հայոց Արնեյց կողմերում՝ Բաբեկը այնուհետև այդ կողմերի համար դառնում է մի կատարյալ պատուհաս: Սևադային դուրս վռնդելուց հետո Սյունյաց իշխանը վախճանվում է: Բաբեկը, օգտագործելով նրա մահը, փորձում է տիրանալ Սյունյաց աշխարհին և այդ նպատակով նույնիսկ ամուսնանում է վախճանված իշխանի դստեր հետ¹⁷: Բաբեկի այս նկրտումները, սակայն, դեմ են առնում հպարտ ու քաջարի սյունեցիների դիմադրությանը, որին նա պատասխանում է կոտորելով Բաղը (826 թ.) և Գեղարքունիք (827 թ.) գավառների բնակչությանը, հրկիզում Մայրավանքը՝ մաքենացիների վանական ծաղկուն համալիրը (ըստ

¹¹ Շարժումն իր այդ անվանումը՝ խուրամյան, ստացել է Արդաբիլի մարզի Խուրամ կոչվող վայրից, որտեղ այն սկզբնավորվել է: Շարժումը տևել է 20 տարի՝ 817-837 թթ.:

¹² Ժամանակագրություն Տեառն Միխայելի Ասորուց պատրիարքի, յԵրուսաղէմ, 1871, էջ 364 (այսուհետև՝ Մ ի ք ա յ է լ Ա ս ո թ ի):

¹³ Նույն տեղում:

¹⁴ Մեծին Վարդանայ Բարձրբերդեցոյ Պատմութիւն տիեզերական, Մոսկվա, 1861 էջ 109 (այսուհետև՝ Վ ա թ դ ա ն Ա թ ն է լ ց ի):

¹⁵ Մ ի ք ա յ է լ Ա ս ո թ ի, էջ 364:

¹⁶ Կ ա դ ա ն կ ա տ վ ա ց ի, էջ 326: Նաև՝ Պատմութիւն նահանգին Միսական, արաբէալ Ստեփանոսի Օրբէկեան եպիսկոպոսի Միւնեաց (այսուհետև՝ Օ թ բ է լ յ ա ն), Թիֆլիս, 1910, էջ 158:

¹⁷ Կ ա դ ա ն կ ա տ վ ա ց ի, էջ 326, Օ թ բ է լ յ ա ն, էջ 158:

Կադանկատվացու՝ մայրաքաղաքը): Հայաստանում գործած նրա այդ վայրագությունների մասին Կադանկատվացին գրում է. «Անհրամանակատար եղև գաւառն Բաղաց՝ յանօրէն Բարբանայ. և ել նա ի Պարսից և էառ աւերեաց զերկիրն և ի սուր սուսերի էարկ զկանայս և զմանկունս Բաղաց: Եւ անտի ի միւս տարին էանց Բարբան ի գաւառն Գեղարքունի և էարկ ի սուսերի զբնակիչսն ոգիս իբրև ԺԵ. հազարս, և զմեծ մայրաքաղաքն Մաքենացոց այրեաց, մնաց միայն ջրադացն և այլ ոչ ինչ և էր թիւն Հայոց ՄՀԶ. (827 – Ն. Ս.)»¹⁸: Ստ. Օրբէլյանի վկայությամբ, Բաբեկին օժանդակում էր Արցախի իշխան Աբլ Ասադը¹⁹: Նրանց այդպիսի համագործակցության մասին խոսում է և Կադանկատվացին: Ըստ վերջինիս՝ Ստեփանոս Աբլ Ասադը սպանվում է, որովհետև «էաճն զԲարբան և եհար զԲաղականեցիսն»²⁰: Բաբեկի այստեղ հայտնվելուց հետո, Հայոց Արևելից կողմանք ավելի քան մեկ ու կես տասնամյակ շարունակ ենթարկվում են նրա անասելի դաժան ասպատակություններին, ավերին ու թալանին: Ահավոր դաժանությամբ էր նա վարվում բոլոր նրանց հետ, ովքեր փորձում էին փոքր-ինչ անհնազանդություն ցուցաբերել: Առաձնապես ծանր էր հայ իշխանների ու ազնվականների դրությունը: Բացի ամեն ինչից նրանք ենթարկվում էին ինքնասիրությունը վիրավորող բարոյական ամենանվաստացուցիչ հարվածների: Արաբ պատմիչների վկայությամբ՝ Բաբեկը հենց իմանում էր, որ նրանցից մեկը զեղեցիկ կին ունի, քույր կամ դուստր, պահանջում էր բերել իր մոտ: Համաձայնության դեպքում գործն ավարտվում էր դրանով, հակառակ պարագայում, նա ինքն էր իր զորքերով գնում այնտեղ, ավերում անհնազանդ իշխանի կալվածքը, կողոպտում ունեցվածքը, ապա խլելով իր տարփանքի գերուհուն, վերադառնում²¹: Պատահական չէ, որ նա պատմիչների կողմից որակվել է որպես «անօրէն», «մարդախողխող, աշխարհավեր, արիւնարբու գազան» մակդիրներով²²:

Հայ ժողովրդի հյուսիսարևելյան այս հատվածը համառ ու հերոսական դիմադրություն էր ցույց տալիս Բաբեկին և հաճախ հաղթանակում: Այսպես. վերը նկարագրված դեպքերից երեք տարի անց՝ 830 թ., Բաբեկը հարձակվում է Ամարաս գավառի վրա և փորձում այն ենթարկել իրեն: Սակայն ոչ ռազմական գործողությունները և ոչ էլ խաղաղությամբ իրեն հնազանդվելու կոչերը չեն կարողանում կոտրել խիզախ ամարասցիների ազատասեր կամքը: Ամրանալով բերդում՝ նրանք դիմադրում են չարին: Ի գորու չլինելով հասնել իր նպատակին, Բաբեկը հեռանում է, բերդի գրավումը հանձնելով զորավարներից Ռոստոմ անունով մեկին: Ինքնավստահ ու գոռոզ այս զորավարը քամահրելով ամարասցիների զորական կարողությունները, գրոհում է բերդը և չարաչար պատժվում:

¹⁸ Կ ա դ ա ն կ ա տ վ ա զ ի, էջ 326-327: Տե՛ս նաև Օ Ր Բ Է Լ Ե Ս, էջ 159:

¹⁹ «(Բաբեկը – Ն. Ս.) եկեալ ձեռնտութեամբ Աբլ Ասադայ Աղվանեցոյ, կոտորեաց սաստիկ և անողորմ զգաւառն Բաղասականայ» (Օ Ր Բ Է Լ Ե Ս, էջ 159):

²⁰ Կ ա դ ա ն կ ա տ վ ա զ ի, էջ 327:

²¹ Տե՛ս, օրինակ, Իբն ալ-Ասիր, թարգմ. բնագրից, առաջաբանը և ծանոթ. Ա. Ն. Տեր-Ղևոնդյանի, Երևան, 1981, էջ 143:

²² Կ ա դ ա ն կ ա տ վ ա զ ի, էջ 326, 330:

Բերդում պատսպարվածները դուրս են գալիս նրա դեմ, ջախջախում և հարկադրում գլխիկոր հեռանալ²³:

Այդ ժամանակներում թե՛ Հայաստանը և թե՛ Արարական խալիֆայությունը ի դեմս Բաբելի ունեին մի ընդհանուր թշնամի, որն անասելի դժբախտություններ էր պատճառում հայերին և սպառնալից վիճակ ստեղծում խալիֆայության համար: Վերջինիս բոլոր փորձերը բռնել և ոչնչացնել նրան վերջանում էին անհաջողությամբ: 835 թ. նշանակվելով փոխարքա, Աֆշինը ևս, իր նախորդների նման, պատերազմական գործողություններ է սկսում Բաբելի դեմ, որոնք փոփոխակի հաջողություններով ձգձգվում են մինչև 837 թ.: Վերջին վճռական ճակատամարտը նրանց միջև տեղի է ունենում նշված թվականի օգոստոս-սեպտեմբեր ամիսներին, որի ժամանակ Աֆշինը սուկայի ջարդ է տալիս Բաբելին և գրավում նրա քաղաք Բադդը²⁴: Սակայն Բաբելին հաջողվում է մի խումբ մարդկանցով փախչել և թաքնվել Հայաստանի լեռներում, մասնավորապես Սահլի տիրույթներում: «Անկառ (Բաբելը –Չ. Ս.) յերկիրն Հայկազնոյն Սահակայ»²⁵, – նշում է Միքայել Ասորին: Իբն ալ-Ասիր արաբ պատմիչն էլ է գրում, որ «Բաբելը գնաց Հայաստանի լեռները թաքնվելու»²⁶: Նա, որ այս իրադարձություններից մի քանի տարի առաջ էր եղել Հայաստանում, գրավել ու մոխրակույտերի էր վերածել Արցախի և Սյունիքի մի շարք գավառներ, լլկել ու անարգել շատ իշխանների (այդ թվում և Սահլ Մմբատյանի) կանանց, դուստրերին ու քույրերին²⁷, այժմ արարներից հալածական, ապաստան էր փնտրում Հայաստանի լեռներում՝ իրական սպառնալիք դառնալով տեղի բնակչության համար: Բմանալով այդ մասին և իշխանության խորքերը նրա մուտքը կանխելու նպատակով, Առանշահիկ իշխանը սահմանի ողջ երկարությամբ պահակակետեր է դնում, դրանցում զինվորներ տեղադրում և աչալուրջ հսկողություն սահմանում: Նման նախազգուշական միջոցառումների շնորհիվ նա հայտնաբերում է Բաբելի թաքստոցը, խորամանկորեն ձերբակալում և հանձնում Աֆշինին²⁸՝ այդպիսով իր հայրենիքը ազատելով «մարդախողիտող գազանից»: Շուտով հարավային Արցախի իշխան, Եսայի Աբու-Մուսեն ձերբակալում և Աֆշինին է հանձնում նաև նրա եղբորը՝ Աբդալլահին²⁹, որը Բաբելի նման, նույնպես փորձում էր ապաստան գտնել Հայոց աշխարհի իրենց իսկ կողմից ասպատակված և դեռևս ծխացող բնակավայրերում: Բաբելին ձերբակալելու և արարական իշխանություններին հանձնելու համար, որպես հատուցում Սահլը Աֆշինից ստանում է պատրիկական թագ,

²³ Կ ա դ ա ն կ ա տ վ ա տ վ ա գ ի, էջ 327-328, Վ ա ր դ ա ն Ա ր ն է լ գ ի, էջ 79

²⁴ Գտնվում է Ատրպատականում, այժմյան Թալիշի Վիլաջ-չայ գետի վերին հոսանքում (տե՛ս Արարական աղբյուրները Հայաստանի և հարևան երկրների մասին, կազմեց Չ. Թ. Նալբանդյան, Երևան, 1965, էջ 145, ծանոթ. 93):

²⁵ Մ ի ք ա յ ե լ Ա ս ո ր ի, էջ 365:

²⁶ Իբն ալ-Ասիր, էջ 142:

²⁷ Նույն տեղում, էջ 143:

²⁸ Կ ա դ ա ն կ ա տ վ ա տ վ ա գ ի, էջ 330: Իբն ալ-Ասիր, էջ 142-144, Տ ա ր ա թ ի.– Արարացի մատենագրեր..., էջ 95, 119:

²⁹ Իբն ալ-Ասիր, էջ 144, Տ ա ր ա թ ի.– Արարացի մատենագրեր..., էջ 95, 119:

թանկարժեք նվերներ, մեծ գումար³⁰: Երկիրն ազատվում է հարկերից³¹, որոնց ծանրության պատճառով էր ապստամբել տեղի ժողովուրդը Սահլի առաջնորդությամբ: Ի լրումն այս ամենի, Աֆշինը Սահլին արտոնում է նաև «Իշխանություն ի վերայ Հայոց, Վրաց ու Ադուանից տիրել իշխանութեամբ ամենեցուն արքայաբար»³²: Արաբ պատմիչների վկայությամբ՝ Սահլը Բաբեկին Աֆշինի մոտ էր ուղարկել իր Մուավիա որդու ուղեկցությամբ, որին փոխարքան նույնպես արժանացնում է դրամական պարգևի³³:

Սահլ Սմբատյանի այս քայլը տարբեր մեկնաբանությունների տեղիք է տվել: Արաբ որոշ պատմագիրներ և նույնիսկ ուշ ժամանակների ուսումնասիրողներից ոմանք, դրա մեջ տեսնում են շահախնդրություն կամ փառասիրություն, ոմանք վրեժխնդրություն և քաղաքական շարժառիթներ³⁴: Խնդրին ավելի սթափ է մոտեցել Հ. Քյուրտյանը, որը գրում է. «Սահլը դրամի համար չէր, որ Բաբակը արաբացվոց կը հանձներ: Սահլ իր հայրենիքը ավերողեն վրեժ կ'առներ»³⁵: Եվ նա իրավացի է: Արաբ մատենագիրների ու հայ պատմիչների մոտ առատ տեղեկություններ կան Հայաստանում Բաբեկի վարած դաժան բռնությունների ու անսանձ կամայականությունների մասին, որոնք ցույց են տալիս, որ Բաբեկից ազատվելը Սահլի առաջնահերթ խնդիրներից էր: Դա բխում էր նախ և առաջ երկրի, Բաբեկի սանձարձակ գործողություններից դժգոհ հայ իշխանների և կոտորվող ազգաբնակչության շահերից: Նրա ձեռքակալման գործում որոշակի դեր պիտի ունենար նաև Սահլի վիրավորված ինքնասիրությունը. Հ. Քյուրտյանը բերում է արաբ պատմիչ Մակդիսի վկայությունը, որի համաձայն «Սահլ կալանավորված էր Բաբակեն, և վերջինս պղծած էր իր մայրը, քույրը և կինը՝ Սահլի ներկայության»³⁶: Ուստի, ձեռքակալելով Բաբեկին ու Աֆշինին հանձնելով, Սահլը ազատում էր հայրենիքը ավազակաբարո նվաճողից, իսկ իրեն՝ անձնական թշնամուց:

Սահլ Սմբատյանին իշխանական թագ շնորհելով և մյուսներին իշխելու իրավունք արտոնելով, արաբները, փաստորեն, նրան ճանաչում են Արցախի գահերեց իշխան կամ իշխանաց իշխան: Այս ակտով, անշուշտ, էլ ավելի է բարձրանում Առանշահիկ տոհմի քաղաքական կշիռը երկրամասում, բայց ոչ ընդլայնում նրա ազդեցության ոլորտները: Առանշահիկների իշխանությունը շարունակում էր ամփոփված մնալ միջնարցախի շրջանակներում:

³⁰ Իբն ալ-Ասիր, էջ 144, Տ ա բ ա թ ի.– Արաբացի մատենագրեր..., էջ 95, 119, նաև՝ Վ ա թ ղ ա ն Ա թ և է լ ց ի, էջ 109:

³¹ Արաբական աղբյուրները Հայաստանի և հարևան երկրների մասին, էջ 181, ծանոթ. 245, Հ. Ա. Ա ղ ա մ յ ա ն. Յագուպի արաբ մատենագիրը և հայերը.– «Բազմավեպ», 1958, թիվ 3-5, էջ 100:

³² Վ ա ղ ա ն կ ա տ վ ա ց ի, էջ 340:

³³ Իբն ալ-Ասիր, էջ 143:

³⁴ Տե՛ս, օրինակ, Տ ա բ ա թ ի.– Արաբացի մատենագրեր..., էջ 95, Յ ա ք ու թ ի.– Արաբացի մատենագրեր..., էջ 119, Մ. Բ ա թ ի ու ղ ա թ յ ա ն. Արցախի, Շաքիի և Փառիսուսի իշխանություններ.– ՊԲՀ, 1971, № 1, էջ 62 և այլն:

³⁵ Հ. Քյուրտյան, նշվ. աշխ, էջ 22:

³⁶ Նույն տեղում, էջ 21: Վերհիշենք, որ արաբ պատմիչ Իբն ալ-Ասիրն էլ էր պատմում, որ Բաբեկը իր պիղծ եղությամբ այդպես էր վարվում բոլոր իշխանների հետ, ով գեղեցիկ կին, քույր կամ մայր ուներ (տե՛ս Իբն ալ-Ասիր, էջ 143):

Նկարագրվող դեպքերի ընթացքում Արցախի անդորրը խոռվվում էր նաև այլ իրադարձություններով: IX դ. 30-ական թվականներին Արցախում հայտնվում են նոր թշնամիներ, որոնց Կադանկատվացին անվանում է «բաղականեցիներ»³⁷: Ուսումնասիրողների կարծիքով վերջիններս հարևան Սյունյաց նահանգ Բաղանիք կամ Բաղք գավառի բնակիչներն էին³⁸: Ավելի քան հավանական է կարծել, որ իսկապես դա այդպես է, և եկել էին նրանք տեղական իշխան Աբլ Ասադ Ստեփանոսից ու Բաբեկից վրեժխնդիր լինելու՝ իրենց երկիրը ավերածությունների ենթարկելու ու մարդկանց կոտորելու համար: Նրանք սպանում են Աբլ Ասադին, որը Բաբեկի աջակիցն էր Բաղքի կոտորածում: Կադանկատվացին գրում է. «Դաւաճանողքն ի սէր խաղաղութեան, որոց անուանք Դաւոն (Դավիթ – Ն. Ս.) ու Շապուհ ճանաչիր, սրով սպանին զՍտեփանոս՝ զկոչեցեալն Աբլ Ասադ, որ էաճն զԲաբան և եհար զԲաղականեցիսն»³⁹ (ընդգծումը մերն է – Ն. Ս.): Կադանկատվացու այս հաղորդման մեջ ուշադրություն է գրավում «դաւաճանողքն ի սէր խաղաղութեան» արտահայտությունը: Դրանից երևում է, որ մինչ այս իրադարձությունը, խաղաղություն է եղել բաղականեցիների և Բաբեկի ու Աբլ Ասադի միջև: Դրան նախորդած դեպքերը՝ դաշնակցությունը Սյունյաց տեր Վասակի հետ, Գեղարքունիքի կոտորածները, «անհրամանակատար» Բաղքի հնազանդեցումը իսկապես կարող էին որոշ ժամանակով խաղաղեցնել ըմբոստ սյունեցիներին, բայց չմարել վրեժի զգացումը: Մինչ նրանք ապրում էին «խաղաղությամբ», ծավալվում են նոր իրադարձություններ: Խալիֆայությունը Բաբեկի խոռվությունը ճնշելու մի փորձ ևս անելով, մեկը մյուսի հետևից նրա դեմ է ուղարկում զորավարներ Հյումայիդ ալ-Տուսին (ըստ Կադանկատվացու՝ Տավուսինին) և Աբրահամին՝ Ղեթա որդուն: Սակայն սրանք ևս իրենց նախորդների նման անհաջողության են մատնվում⁴⁰: Բաղականեցիները, օգտվելով նրանց դեմ պատերազմով Բաբեկի զբաղվածությունից, Դավոյի (Դավիթի) և Շապուհի առաջնորդությամբ ապստամբում են ու, խախտելով Կադանկատվացու ասած «խաղաղությունը», հարձակվում են նրանց վրա: Որպես իրենց հասած պատուհասների հիմնական մեղավորի, նրանք սպանում են Աբլ Ասադին, Բաբեկին իրենց վրա բերելու համար, գրավում են Բերդաձոր գավառն ու Ուոեաց գավառակի ավանները՝ Կառնակաշը, Հակարին ու Տափասը և «ի սուր նիզակաց կոտորեցին»⁴¹ մարդկանց: Այնուհետև նրանք ամրանում են Գորոզու բերդում (Հաղրութի շրջանում՝ այժմյան Տումի գյուղի տեղում) և հարձակումներ գործելով շրջակա գավառների վրա, գրավում են նաև Վերին Վայկունիքը, Բերձորը, Միսականը, Հաբանդը, Ամարասը, Պազկանքը և Մխանքը: Արցախի այս գավառներից զատ ապստամբները գրավում են Ուտիք նահանգի Տրի գավառը և տասներկու տա-

³⁷ Կ ա դ ա ն կ ա տ վ ա զ ի, էջ 327:

³⁸ Ա լ ի շ ա ն. Արցախ, Երևան, 1993, էջ 173. Ն. Ք յ ու թ տ յ ա ն. նշվ. աշխ., էջ 17, Ն. Ա դ ն ն ց. Քննություն Մովսես Կադանկատվացու.– Երկեր, հ. Ա, Երևան, 2006, էջ 476: Բ տարբերություն նշվածների, Ֆ. Մամեդովան գտնում է, որ նրանք պավլիկյաններ էին (տե՛ս Փ. М а м е д о в а. Кавказская Албания и албаны. Баку, 2005, с. 393):

³⁹ Կ ա դ ա ն կ ա տ վ ա զ ի, էջ 327:

⁴⁰ Նույն տեղում:

⁴¹ Նույն տեղում:

րի⁴² իշխում այս տեղերում⁴³: Չնայած Աբլ Ասադի ազգականները բռնում ու սպանում են Դավոյին և Շապուհին⁴⁴, բայց դրանով վերջ չի դրվում նրանց ասպատակություններին: IX դ. 40-ական թվականներին օտարամուտները նոր ավերածությունների են ենթարկում Միսական, Ամարաս և Տրի գավառները⁴⁵: Այլևս չհանդուրժելով նրանց գոյությունը, սպանված իշխանի քրոջ որդին՝ մեզ արդեն ծանոթ Եսայի Աբու Մուսեն, հարձակվում է ասպատակիչների վրա, խոշոր ջարդ տալիս և վերջնականապես դուրս քշում երկրից⁴⁶: Ազատագրված գավառները նա միացնում է սեփական տիրույթներին և իշխում բոլորի վրա՝ Կաղանկատվացու բառերով, «իշխանացաւ ամենայնի»⁴⁷:

Այնուամենայնիվ, բաղականեցիներից ազատվելը դեռ չէր ապահովում Արցախի խաղաղությունն ու հանգիստը: Շուտով նրանց գլխին մի նոր սպառնալիք է կախվում, քանզի արաբները շարունակում էին իրենց խստալուծ քաղաքականությունը: Դա էր պահանջում նաև խալիֆայությունում սկսված քայքայման ընթացքը կանխելու անհրաժեշտությունը: Մութավաքիլ խալիֆը (847–861 թթ.) դիմում էր ամեն մի միջոցի այն մասնատումից ու փլուզումից փրկելու համար: Նրա առանձնակի հոգածության հարցը իրենց տիրակալության ծայրագույն մարզերում և հատկապես Արմինիայում հանգիստն ապահովելն ու պահպանելն էր: Այստեղ իր ներքին ինքնուրույնությունն էր շարունակում պահպանել Հայաստանը: Հարկավոր էր վերջ տալ այդ ինքնավարությանը, թուլացնել երկիրը և ամբողջովին ենթարկել խալիֆայությանը, հարկերը հավաքել առավելագույն չափերով, էլ ավելի սահմանափակել քրիստոնյաների իրավունքը, մահմեդականներին տալ ամենալայն արտոնություններ: Այսպիսի հանձնարարականով որպես կառավարիչ Հայաստան է ուղարկվում Աբու Սայիդ Ապուսեթ անունով մի պալատական, որը, սակայն, գալով և տեղում տեսնելով հայ իշխանների միակամությունն ու դիմագրավելու պատրաստակամությունը, խալիֆի առաջադրանքը կատարելու համար մարդիկ թողնելով, հեռանում է երկրից⁴⁸: Մակայն վերջիններիս գործողությունները բովանդակ Հայաստանում առաջ են բերում հակաարաբական մի շարժում, որ շուտով ծավալվելով վերածվում է զինված ապստամբության⁴⁹: Ապստամբությունը ճնշելու համար Մութավաքիլ խալիֆը մեծաթիվ բանակով 852 թ. Հայաստան է ուղարկում Բուդա Շարաբի անու-

⁴² Հ. Քյուրտյանը բնագրի «գամս ԺԲ»-ն ուղղում է «ամիսս տասն և երկու» (տե՛ս Հ. Քյուրտյանի աշխ., էջ 18):

⁴³ Կ ա դ ա ն կ ա տ վ ա ց ի, էջ 327:

⁴⁴ Նույն տեղում:

⁴⁵ Նույն տեղում, էջ 331:

⁴⁶ Նույն տեղում:

⁴⁷ Նույն տեղում, էջ 327: Թովմա Արծրունին էլ է գրում, որ Եսայի Աբու Մուսեն «տիրեր... մեծի կողմանն Աղուանից (իմա՛ Հայոց Արևելից կողմանց – Հ. Ս.)». տե՛ս Թ ո վ մ ա Արծրունի և Ա ն ա ն ու ն. Պատմութիւն տանն Արծրունեաց (այսուհետև՝ Թ ո վ մ ա Արծրունի), Երևան, 1985, էջ 276:

⁴⁸ Թ ո վ մ ա Արծրունի, էջ 170-172, նաև՝ А. Тер - Гевондян. Նշվ. աշխ., էջ 138-139:

⁴⁹ Լ է ո. Հայոց պատմություն. – Երկերի ժողովածու, հ. 2, Երևան, 1967, էջ 424 և հուգ., Հայ ժողովրդի պատմություն, հ. 2, Երևան, 1984, էջ 352-354:

նով «թուրք ազգաւ»⁵⁰ մի գորավարի, որ էր «չարագոյնն քան գամենեսեանս»⁵¹, միաժամանակ նրան նշանակելով Արմինիայի կառավարիչ (852–855 թթ.): Հայաստանում նա ամենուրեք հանդիպում է ուժեղ դիմադրության⁵²: Սակայն Բուդային հաջողվում է կոտրել հայերի համառությունը, հնազանդեցնել նրանց և անցնել Վիրք, որտեղ ասպատակում է Տփղիսն ու նրա շրջակայքը, ապա Կովկասի գլխավոր լեռնանցքներին տիրելու նպատակով հարձակվում ծանարների երկրի վրա, որտեղ նրան սպասում էր դառն հիասթափությունը: Արքունի գորքը բոլոր ճակատամարտերում ջարդվում է և ստիպված վերադառնում «կորակնեայք ամօթալից խայտառակեայք»⁵³:

Ծանարներից կրած դաժան պարտության վրեժը Բուդան որոշում է հանել հայերից և վերադառնալով Հայաստան 852 թ., շարժվում է նրա Արևելից կողմանց՝ Ուտիք-Արցախյան հայաշխարհի վրա: Հաստատվելով Պարտավում և ունենալով ուժերի գերակշռություն՝ Բուդան սկսում է հարձակումներ գործել մերձակա գավառների վրա: Տեղի բնակչությունը, իրենց իշխանների՝ Խաչենի իշխան Ատրներսեհի, Ուտիքի Տուս գավառի Սևորդյաց իշխան Ստեփանոս Կոնի, Գարդմանի Կտրիճ իշխանի առաջնորդությամբ ոտքի են էլնում պաշտպանելու իրենց երկիրը: Առավել ուժեղ էր վերջինիս գլխավորած դիմադրությունը: Ամրանալով Գարդման բերդում՝ նա երկար ժամանակ հերոսաբար պաշտպանվում է: Բայց ուժերն անհավասար էին: Բուդան պաշարում է բերդը, պատնեշներ կառուցում նրա շուրջը և գրոհով գրավում այն: Ձերբակալվում ու շղթայվում է Կտրիճ իշխանը⁵⁴: Մեկը մյուսի ետևից հնազանդության են բերվում նաև մյուս քմբուսները: Կտրիճ իշխանի ճակատագիրը կիսում են Ատրներսեհը «և գալլ ևս զհամազգիս նորա» ու Ստեփանոս Կոնը⁵⁵: «Ոչ սակաւ ինչ արեան ճապաղիս հեղեպ ևս յայն աշխարհին»⁵⁶, Բուդան շարժվում է հարավային Արցախ: Այստեղ իշխան Եսայի Աբու Մուսեի կարգադրությամբ ժողովուրդը բռնում է տարածքի լեռնակողմերը, փակում լեռնանցքները, ամրացնում բերդերը և պատրաստվում կռվի: Եսայի Աբու Մուսեն իր մարդկանց կռվի է նախապատրաստում նաև հոգեպես: Դիմելով նրանց և օրինակ բերելով ծանարներին, նա ասում է. «ոչ ... վատագոյն մեք քան զԾանարսն եղիցուք, զի և ամուրս հզորագոյնս և բարձրագոյնս քան զնոսս ունիմք և դիրափակս՝ առ ի յունել զմուսս կրճիցն. միայն միաբանութեամբ սրտիս կացցուք ապաւինեալ յօգնականութիւնն Աստուծոյ. և թէ մեռանիլ ևս ումեք հասցէ՝ ի պարծանս անձին և ազգին իւրոյ համարեալ է, և պսակ

⁵⁰ Կ ի ր ա կ ո ս Գ ա ն ձ ա կ ե ց ի. Պատմություն Հայոց (այսուհետև՝ Գ ա ն ձ ա կ ե ց ի), աշխատասիրությամբ Գ. Ա. Մելիք-Օհանջանյանի, Երևան, 1961, էջ 78:

⁵¹ Սամուէլի քահանայի Անեցոյ Հաւաքմունք ի գրոց պատմագրաց (այսուհետև՝ Ս ա մ վ է լ Ա ն է ց ի), Վաղարշապատ, 1893, էջ 93:

⁵² Տէ ն Հայ ժողովրդի պատմություն, հ. 2, էջ 354-357:

⁵³ Թ ո վ մ ա Ա ր ծ ր ու ն ի, էջ 276:

⁵⁴ Յովհաննու կաթողիկոսի Դրասխանակերտցոյ Պատմութիւն Հայոց (այսուհետև՝ Դ ր ա ս ի ա ն ա կ ե ր տ ց ի), Երևան, 1996, էջ 130:

⁵⁵ Նույն տեղում: Նաև՝ Ստեփանոս Տարօնեցոյ Ասողկան, Պատմութիւն տիեզերական (այսուհետև՝ Ա ս ո ղ ի կ), Սանկտ Պետերբուրգ, 1885, էջ 107:

⁵⁶ Դ ր ա ս ի ա ն ա կ ե ր տ ց ի, էջ 130:

մարտիրոսական ընկալցի ի Քրիստոսէ. զի ոչ էթէ ըստ հասարակաց սահմանաւոր մահու է, այլ ի վերայ սուրբ եկեղեցւոյ և ժողովրդեան Աստուծոյ»⁵⁷: Բուղան Եսայի Աբու Մուսէին հնագանդության կոչ է անում: Սակայն հպարտ իշխանը, ամրանալով Մյուս Հաբանդ գավառի Քթիշ (Գտիչ) կոչվող ամրոցում (ներկայիս ԼՂՀ-ի Հադրութի շրջանի Տոդ գյուղի մոտ) և այնտեղ հավաքելով շրջակա գավառների բնակչությանը՝ կանանցով ու երեխաներով, մթերք պաշարելով, պատրաստվում է կովի: Սկսվում են գրոհները, որոնք բոլորն էլ վերջանում են անհաջողությամբ: Տեսնելով դա՝ Բուղան նորից է դիմում Եսայի Աբու Մուսէին և «ողորթական բանիւք»⁵⁸ կրկնում հպատակության իր առաջարկը: Պատասխան խոսքում Եսայի Աբու Մուսէն Բուղային հայտնում է նրա դեմ մինչև վերջին շունչը կովելու իր անբեկանելի որոշման մասին և խորհուրդ տալիս հեռանալ խաղաղությամբ, եթե իր համար թանկ է սեփական կյանքն ու գորքի ողջությունը: Նամակում նա նախ պարսավում է արաբ զորավարին, որ հակառակ աշխարհակալների մոտ ընդունված օրենքի, որը նրանց պարտավորեցնում է հոգ տանել հպատակների մասին, թերևս անհավանական տառապանքները, ինքը ավերածություններ ու կոտորածներ է սփռում, ապա շարունակում. «Եւ արդ յայտնի լիցի, զի որչափ բաւէ զօրութիւն իմ ու իցեմ կենդանի՝ կացից ընդդէմ զօրութեամբ և ուժով տեսնն Աստուծոյ, և ոչ տեսից զքեզ սիրով խաղաղութեան. այլ տեսից զքեզ զհնու և աղեղամբ և սրով, քաջ արամբք և ընտիր երիվարօք և քեզ էթէ հաճոյ թուիցի ապրեցուցանել զքեզ և զգօրս քո՝ արի էլ աստի և գնա ի սահմանաց իմոց ... ի քո ձեռս է խաղաղութիւն և խոռովութիւն: Եթէ, որպէս ասացի, ի բաց գնաս յինէն՝ խաղաղութիւն է, և թէ ոչ՝ պատերազմ և կռիվ, և ճակատամարտ»⁵⁹:

Եսայի Աբու Մուսէի պատասխանից շփոթահար, Բուղան նամակներ է հղում խալիֆին, պատմում իրադարձությունների ընթացքի ու քաջ իշխանի մասին և կարգադրությունների սպասում: Սպասման ընթացքում արաբ զորավարը շրջափակում է Քթիշ բերդը: Գրոհները բերդի վրա հաջորդում են մեկը մյուսին, սակայն հայերը մնում են անընկճելի: Բուղայի բոլոր փորձերը՝ կոտրել լեռնցիների դիմադրությունը, անցնում են ապարդյուն: Նրան չեն օգնում ոչ հավաքագրած ընտիր զորքը, ոչ ամրոցի շուրջը պատնեշների կառուցումը, ոչ կուտակած քարերն և ոչ էլ բերված քարանետ մեքենաները:

Հերթական պարտությունից հետո, ամոթահար Բուղան 10 օր շարունակ փակվում է վրանում և, մտատանջությունների մեջ ընկած, ստեղծված դրությունից դուրս գալու ելք է փնտրում: Այդ ժամանակ արքունիքից ստացվում է Բուղայի նամակի պատասխանը, որով պատերազմը մինչև հաղթական վախճան անվհատ շարունակելու կարգադրություն է արվում: Եվ Բուղան խնամքով նախապատրաստվում է կովի. Քթիշ բերդը մի վերջին վճռական գրոհով վերցնելու

⁵⁷ Թ ո վ մ ա Ա ր ծ ր ու ն ի, էջ 276:

⁵⁸ Նույն տեղում, էջ 278:

⁵⁹ Նույն տեղում: Նամակը, որ համեմված է գեղեցիկ համեմատություններով ու պատկերավոր արտահայտություններով, գեղարվեստական խոսքի արժեք ունի: Ամբողջությամբ տե՛ս նույն տեղում, էջ 278-280:

նպատակով, նա այնտեղ է հավաքում իր տրամադրության տակ գտնվող ամբողջ զորքը, թվով 200 հազար մարդ, հանդերձավորում և զինում զենքի բոլոր տեսակներով: Չորքին էլ ավելի ահեղ տեսք հաղորդելու համար, նա այն զարդարում է պես-պես և շողշողուն նշաններով: Վերջացնելով նախապատրաստությունը, արար գորավարը այդ ահագին բազմությունը, որը հենց միայն իր փայլատակող սպառազինությամբ, ծածանվող բազում դրոշներով, փողերի ու շեփոռների որոտմունքներով ու զենքերի շայտուններով արդեն իսկ երկյուղ էր ներշնչում, շարժում է բերդի պաշտպանների վրա: Այս անգամ նրան հաջողվում է նույնիսկ մոտենալ բերդին: Բուղային թվում է, թե մոտ է հաղթանակը, վերջապես կոտրված է բերդեցիների դիմադրությունը, և նրանք շուտով կհանձնվեն իր ողորմածությանը: Բայց աննկուն արցախցիները, կուռ շարքեր կազմելով, անցնում են հակահարձակման, հուժկու հարվածներով արաբներին ետ մղում լեռան վրայից և շարունակելով ջարդել փախչող հակառակորդին, հետապնդում են մինչև վերջիններիս ապաստանելը իրենց բանակատեղիում: Անսասան լեռնցիները ձեռք են բերում նաև մեծաքանակ ավար: Թովմա Արծրունին այսպես է նկարագրել հերոսական այս ճակատամարտը. «Եւ զօրքն Տաճկաց, պնդեցան և փակեցին շուրջանակի ի ներքս զգունդն Աղուանից և դիմեցին յանդուզն ի վերայ նոցա. և նոքա կային անշարժ, և ոչ էլ այր քան զընկեր յառաջ. և մինչ նոքա կարծեցին թէ ի ձեռն նոցա մատնեցան՝ և նոքա կային յաղօթս և զԱստուած կարդային օգնել նոցա. և դիմեցին ի մէջ նոցա ի չորս առաջս ըստ նմանութեան տեսանանման իսաչին, և բախեցին զճակատն և պատառեցին զոսգմն դարձուցին ընդ զառ ի վայրն և իջուցին ի լեռնէ անտի, և հարին ի հարուածս մեծամեծս. որպէս յարդ ի հողմոյ վարեալ, կամ ծուխ վատնեալ ի մրրկէ՝ այնպէս կորեան գնացին յերեսաց զօրացն Աղուանից (Հայոց Արևելից կողմանց – Ն. Ս.): Եւ դարձան կուտեցին աւար, որոց ոչ գոյր թիւ»⁶⁰:

Պատմիչի այս նկարագրության մեջ երևում է Եսայի Աբու Մուսեի ռազմավարական հմտությունը: Չորքը բաժանելով չորս մասի և դասավորելով Քրիստոսի իսաչի նման, այսինքն՝ քառաթև, որով յուրաքանչյուր թևը ապահովված կլիներ թիկունքից, ու կարգադրելով մնալ անշարժ և առաջ չընկնել մեկը մյուսից, որից արաբները կխաբվեին՝ կարծելով, թե բերդում պատսպարվածները չեն դիմադրելու իրենց և ավելի կմոտենային բերդին, նա հարկավոր պահին միաժամանակ բոլոր կողմերից հարձակվում է հաղթանակի հույսով միամտված արաբների վրա և, ճիշտ օգտագործելով տեղանքի գառնիվայր մակերևույթը՝ վերևից խփելով դեպի բերդ բարձրացող արաբներին, ջարդ է տալիս ու հեռացնում իրենից:

Այսպես մի ամբողջ տարի Բուղան հուսահատ փորձեր է անում գրավել Քթիշ ամրոցը: Այդ ընթացքում նա 28 անգամ գրոհ է կազմակերպում ամրոցի փոքրաթիվ բանակի վրա, սակայն ամեն անգամ դառը պարտություն կրելով, հարկադրված է լինում զլիսիկոր հեռանալ⁶¹: Տեսնելով, որ զենքի ուժով չի կարողանում ծնկի բերել հզոր իշխանին, Բուղան դիմում է նենգության: Խալիֆի հետ պայմա-

⁶⁰ Նույն տեղում, էջ 284-286:

⁶¹ Մղված բոլոր ճակատամարտերի մանրամասն նկարագրությունները տե՛ս նույն տեղում, էջ 280-286:

նավորվելով՝ թուրք զորավարն առաջարկում է, որ յուրաքանչյուրն առանձին նամակ հղի խալիֆին և բացատրություն տալ իրենց գործողությունների համար: Իր նամակում Եսայի Աբու Մուսեն հավատացնում է խալիֆ Մութավաքիլին, որ ինքն ապստամբ չէ և խալիֆայության դեմ չէ, որ կռվում է, այլ զենք է վերցրել հարկադրաբար՝ Բուղայի վայրագ գործողությունների հետևանքով: Նա միաժամանակ հայտնում է իր պատրաստակամությունը խաղաղություն կնքելու մասին: Մինչ նամակների պատասխանների գալը, հայտարարվում է զինադադար: Շուտով ստացվում են և դրանք: Եսայի Աբու Մուսեին ուղղված թղթում խալիֆը նրան անմեղ է ճանաչում և թողություն շնորհում նրա պատճառած վնասների, զորքի կոտորածի ու ավարների համար: Նա իշխանին նաև պատվական հանդերձներ է ուղարկում, նախշագարդ սաղավարտ ու սուր, կնիքով հավաստված երդմնագիր և առաջարկում իջնել Բուղայի մոտ, իսկ վերջինիս հանձնարարում է ընդունել նրան պատվով, անբարյացակամություն ցույց չտալ և զգուշությամբ ուղարկել իր մոտ⁶²:

Միամիտ լեռնականը, որը որքան աննկուն էր ու քաջ բաց ճակատամարտում, նույնքան էլ անզոր պալատական դավերի ու խաբեության հանդեպ, հավատալով իրեն տրված խոստումներին, թողնում է անառիկ ամրոցը և գնում է Բուղայի մոտ: Սա ստացած հրամանի համաձայն նրան ընդունում է մեծ շուքով, զորահանդեսային ձեսերով և խաբկանքի երեքօրյա ձոխ հյուրասիրությունից հետո ձերբակալում է և շղթայակապ անում⁶³:

Դիմադրությունն Արցախում ճնշված էր:

855 թ. Բուղան ետ է կանչվում: Նա իր հետ («առեալ ընդ իւր»⁶⁴) «ի կալանս կապանաց» Սամարա՝ խալիֆայության այն ժամանակվա մայրաքաղաքն⁶⁵ է տանում ձերբակալված հայ իշխաններին՝ Գարդմանի Կտրիճ իշխանին, Տուս գավառի իշխան Ստեփանոս Կոնին, Խաչենի իշխան Ատրներսեհին ու նրա հորը՝ Սահլ Սմբատյանին, Եսայի Աբու Մուսեին և այլ իշխանների ու ազնվական մարդկանց⁶⁶:

Սամարայում հայ իշխանները ենթարկվում են անլուր չարչարանքների: Սահվան սպառնալիքի տակ արարները գերեվարվածներից պահանջում են ընդունել մահմեդականություն, որին ոմանք առերես համաձայնում են: Բայց մի խումբ իշխաններ էլ, նրանց թվում և Հայոց Արնելից կողմերից՝ Ստեփանոս Կոն իշխանը, հավատարիմ մնալով հայրերի դավանանքին, մերժում են արարների առաջարկը և ընդունում մահը⁶⁷:

⁶² Նույն տեղում, էջ 286-288:

⁶³ Նույն տեղում, էջ 288, Տ ա բ ա թ ի.- Արաբացի մատենագրեր..., էջ 100-101:

⁶⁴ Դ թ ա ս խ ա ն ա կ ե թ տ ց ի, էջ 130:

⁶⁵ Սամարան խալիֆայության մայրաքաղաքն էր 836-892 թթ.:

⁶⁶ Կ ա դ ա ն կ ա տ վ ա ց ի, էջ 340, Թ ո վ մ ա Ա թ ը թ ու ն ի, էջ 296-298, Դ թ ա ս խ ա ն ա կ ե թ տ ց ի, էջ 130, Ա ս ո ղ ի կ, էջ 107, Վ ա թ դ ա ն Ա թ և ե լ ց ի, էջ 81, Տ ա բ ա թ ի.- Արաբացի մատենագրեր..., էջ 100-101:

⁶⁷ Դ թ ա ս խ ա ն ա կ ե թ տ ց ի, էջ 132, Ա ս ո ղ ի կ, էջ 107, 110, Գ ա ն ձ ա կ ե ց ի, էջ 79, Օ թ թ ե լ յ ա ն, էջ 173, Ս ա մ վ է լ Ա ն ե ց ի, էջ 94:

857–859 թթ. Մամարայում արքայի մեջ գտնվող հայ իշխանները ազատություն են ստանում և մեկ-մեկ վերադառնում հայրենիք⁶⁸: Այստեղ նրանք թողնում են առերես ընդունած մահմեդականությունը և վերստին անցնում քրիստոնեական հավատին:

Մահլ Մմբատյանը և Եսայի Աբու Մուսեն *ոչ* հանուն հավատի նահատակվածների մեջ են հիշատակվում և *ոչ* էլ գերությունից վերադարձածների: Հավանաբար, նրանք վախճանվել էին արքայում կամ պահվել որպես գերի: Հ. Քյուրտյանը կարծում է, որ Եսայի Աբու Մուսեն 906 թ. դեռ ողջ էր⁶⁹: Դրա համար նա վկայակոչում է Ստ. Օրբելյանին, որի հաղորդումներից մեկի համաձայն, նշված թվականին Տաթևի վանքի սահմանները հաստատող վավերագրի տակ իրենց ստորագրություններն են դրել նաև Եսայի, Գրիգոր և Ատրնեսուեհ Աղվանից (Հայոց Արևելից կողմանց) իշխանները⁷⁰: Մակայն ժամանակի այն մեծ տարբերությունը, որ ընկած է Աբու Մուսեի գերի տարվելու՝ 855 և 906 թվականների միջև բացատրում է նման հնարավորությունը: Այստեղ հիշատակված Եսային, Ս. Բարխուդարյանի իրավացի մեկնաբանությամբ, կարող էր լինել քաջագոր իշխանի նույնանուն թոռը⁷¹, որը հայկական ընտանիքներում ընդունված ավանդույթի համաձայն կրում էր իր պապի անունը:

Բուդայի ետ կանչվելուց հետո՝ նույն 855 թ. հայոց կառավարիչ, ապա և 861 թ. իշխանաց իշխան է նշանակվում Աշոտ Բագրատունին: Արցախում, ինչպես և բովանդակ Հայաստանում բուռն իրադարձություններին հաջորդում է խաղաղության տևական մի շրջան, որն իր դրական անդրադարձն է ունենում երկրամասի սոցիալ-տնտեսական, քաղաքական ու մշակութային կյանքի վրա:

IX դարի դիմադրական կռիվներն արաբական լծի դեմ ապարդյուն չեն անցնում: Նրանց ճնշման ներքո 885 թ. ողջ Հայաստանի հետ մեկտեղ արաբական լծից ազատագրվում է Հայոց երկրի այս հատվածը ևս և Բագրատունիների գլխավորած ազատ ու անկախ Հայկական թագավորություն կազմի մեջ մտնող մյուս հայ ավատատիրական իշխանությունների շարքում շարունակում հյուսել իր հերոսական պատմությունը:

ОБСТАНОВКА В АРЦАХЕ В ПЕРВОЙ ПОЛОВИНЕ IX ВЕКА. ПРОТИВОСТОЯНИЕ АРМЯН

ГЕНРИК СВАЗЯН

Р е з ю м е

В середине VIII в. в Арабском халифате к власти пришла династия Аббасидов, что оказало свое отрицательное влияние в подвластных странах и, в частности, в Великой Армении и ее окраинных

⁶⁸ Դ ր ա ս ի ա ն ա կ ե ր տ ց ի, էջ 134, Ա ս ն դ ի կ, էջ 110:

⁶⁹ Հ. Քյուրտյանի նշվ. աշխ. էջ 139:

⁷⁰ Օրբելյանի, էջ 234:

⁷¹ Ս. Բարխուդարյանի Արցախի, Շաքիի և Փառխուսի իշխանությունները, էջ 57:

областях – Утике и Арцахе. Утвердившись в Партаве, арабы чаще нападали на окружающие земли, грабя и убивая людей. Однако местные жители во главе со своими князьями каждый раз противостояли им, разбивали и изгоняли со своих земель. Иногда они восставали из-за тяжести налогов и произвольных действий налоговосборщиков. Здесь нашли свой конец и другие захватчики, в том числе и Бабек, который, пытаясь скрыться от арабов в Армении, был схвачен князем Сахлем Смбабяном Араншаником и выдан наместнику Афшину. В 825 г. для подавления восстания на Армению двинулся арабский полководец Буха. В некоторых местах ему удалось покорить восставших и схватить их князей-вождей. Он направился в южный Арцах, где жители во главе с князем Есаи Абу Муса, укрепившись в крепости Ктиш, оказали ему упорное сопротивление. Буха осадил крепость и совершив в течение года 28 штурмов, не смог ее захватить. Тогда Буха обманом заманил Есаи Абу Муса, заковал в цепи и вместе с другими армянскими князьями отправил к халифу. После подавления восстания Буха был вызван в халифат. Страной начал управлять князь Ашот Багратуни. Арцах, будучи одним из политических образований феодальной Армении, продолжал свою независимую от иноземных завоевателей жизнь.